

Janji PM Bawa Pulang Mangsa Nahas MH17 Hampir Jadi Kenyataan
Bernama
July 22, 2014

KUALA LUMPUR, 22 Julai (Bernama) -- Janji Perdana Menteri Datuk Seri Najib Tun Razak kepada anggota keluarga mangsa nahas pesawat Malaysia Airlines MH17 untuk membawa pulang kesemua mayat warga Malaysia untuk disemadikan di negara ini hampir menjadi kenyataan.

Ini susulan persetujuan yang dicapai antara beliau dengan Alexander Borodai, individu yang berkuasa di wilayah pesawat itu terhempas Khamis lepas, berhubung pengendalian mayat mangsa dan kotak hitam pesawat serta jaminan akses yang selamat bagi pasukan penyiasat antarabangsa untuk memulakan siasatan.

Dalam sidang media di Seri Perdana, Putrajaya awal hari Selasa, Najib antara lain berkata 282 mayat mangsa nahas Boeing 777 itu akan diterbangkan ke Amsterdam, Belanda, diiringi pasukan Malaysia.

Anggota keluarga mangsa nahas pastinya menarik nafas lega dengan kenyataan Perdana Menteri bahawa setelah melalui proses forensik, jika perlu, mayat warga Malaysia akan diterbangkan pulang ke tanah air.

Satu lagi perkembangan signifikan ialah persetujuan supaya kotak hitam pesawat membawa 298 penumpang dan anak kapal yang terhempas disyaki akibat tembakan peluru berpandu itu, diserahkan kepada pasukan Malaysia di Donetsk.

Kenyataan Najib itu memberi harapan kepada rakyat Malaysia khususnya anggota keluarga mangsa yang mahu punca tragedi itu disiasat secepat mungkin, sekali gus memberi keadilan kepada mangsa yang terkorban.

Pasukan siasatan khas Malaysia berhubung tragedi MH17 itu diketuai Khairil Hilmi Mokhtar bersama 131 anggota daripada pelbagai agensi kerajaan berada di Kiev sejak Sabtu.

MH17 ditembak jatuh di wilayah Donetsk, bahagian timur Ukraine, ketika dalam penerbangan dari Amsterdam ke Kuala Lumpur.

Di Kiev, Perdana Menteri Ukraine Arseniy Yatsenyuk dalam sidang akhbar seperti dipetik di laman web Pusat Media 'Ukraine Crisis' pada Isnin, berkata keutamaan diberi kepada usaha mengumpul dan membawa keluar semua mayat serta mengutip bukti berkaitan nahas itu.

Yatsenyuk berkata Ukraine bersedia memberi peranan utama kepada Belanda dalam penyiasatan selain membenarkan penyiasat antarabangsa memeriksa peralatan

persenjataannya untuk membuktikan ia tidak ada kena-mengena dengan tragedi MH17.

Presiden Ukraine Petro Poroshenko pula dilapor telah mengarahkan tenteranya menghentikan sebarang aktiviti ketenteraan dalam lingkungan 40 km dari kawasan MH17 terhempas berkuat kuasa serta-merta.

Ia sebahagian daripada inisiatif kerajaan negara itu untuk mempercepatkan usaha pasukan penyiasatan bersama antarabangsa mendapat laluan yang selamat ke tempat kejadian.

Dalam perkembangan lain, Menteri Komunikasi dan Multimedia Datuk Seri Ahmad Shabery Cheek berkata sidang tergempar Parlimen bagi membincangkan nahas itu akan disiarkan secara langsung di TV1, Rabu ini.

Dalam catatan di laman Facebooknya, beliau berkata persidangan itu akan disiarkan bermula 10 pagi dan orang ramai boleh juga melayari <http://m.rtm.gov.my/>.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1055343>